

## Biografia di Hector Mario Quilotte”(Tico)

**Hector Mario Quilotte** a nace na Aruba, dia 24 di november 1941 den Ranchostraat. Su number di cariño ta Tico. Su mama yama Betsy Otilia Odor, casa cu Hector Eziquiel Quilotte. Nan ta en total shete ruman, cinco ruman homber y dos ruman muhe. Tico ta di cinco. E ta viudo awor. Su señora yama Julieta Quilotte-Jansen y a nace dia 7 di mei 1944. Tico a casa na 1966 y nan no tin yiu. Tico a lanta y crese den Rancho.



### E bida artistico a nifica comparti cantamento y musica cu su trabou

**Segun Tico cu tocamento no a cambia su bida, e la comparti'e hunto cu su bida**

Semper Tico a comparti su cantamento y tambe e tocamento cu su trabou. E tabata traha na Directie Posterijen, encarga cu un trabou hopi responsabel. Hasta e director a manda yam'e cu e mensahe cu ta un Dios e por sirbi. Sea postkantoor of keda canta, pasobra nan tabata toca practicamente tur anochi na hotel y ora Tico bay traha mainta, e curpa no ta dje bon ey.

Cu tocamento a cambia su bida, absolutamente cu no! Tico a compartie hunto cu su bida y te dia di awe, ainda e no por para keto. Tico ta core auto, nan ta bisa e homber aki ta loco, pasobra tin ora e ta stuur bou di cantamento, pasobra bo ta expresa bo mes, e ta e miho manera pa bo saca loke bo tin aden. Sea ta tristesa of alegria.

### E bida Artistico

Tempo nan tabatin 14 aña, Rudolf Brete (dfm) cu Tico tabata bay continuamente na e show di Adisson Croes (dfm), na e radio-emisora Voz di Aruba. E tabata buscando talento artistico. Anto Rudolf tabata esun cu ta luci, pasobra e tabata canta tenor y Tico ta manera esun pa anim'e! Semper Tico tabatin gana di canta, pero cu un tiki miedo dje microfon. E n'sa kico microfon a hacie, pero nunca Tico a logra canta den e programa Buscando Talento Artistico. E por toca un tiki

maraca y raspa, pero no otro instrumento musical. Nunca Tico a sigui les di canto. E tabata den koor, ey Tico a wordo yuda hopi door di defunto Rhoda Frigerio. Nan tabata canta den su coro y a forma un *musical review*. Nan a bay duna un presentacion di prueba (na Ingles: *audition*), na Aruba Caribbean Hotel. Lamentablemente nan no a acepta nan. Pues di Rhoda Tico a haya hopi guia den canto y tambe di defunto Rufo Odor (dfm), cu porcierto ta un famia di Tico



Tico Quilotte tras di microfoon

tambe. Bon, bo por bisa den su trayectoria musical, Tico a canta tur cos. Tico a cuminsa den “De Trupialen”, despues cu “Los Elegantes”. E tempo aya, for di 1955 bin ariba, nan tabata canta tur cos! Y porcierto den los Elegantes mes nan a compaña Enrique Guzman, kende a bin Aruba. Como cu nan tabata toca y canta tur e canticanan di dje cu tur e artistanan di Hooligans na Mexico, nan a compañ’e facilmente. Y despues di esey, Tico a pasa pa musica latino y e tabata canta tur cos. Loke mas Tico ta gusta ta bolero.

## Participacion den diferente grupo musical

Anteriormente Tico a cuminsa cu “Los Elegantes”, despues cu “The Hap Cats” cu a bira “Oruba Sextet” y despues a cambia den “Latin Power”. Tico a canta cu e orkesta di Mario Bislik (dfm) tambe. Y cu Joy Kock tambe nan a toca den Sheraton cu “The Golden Notes”. Nan a toca basta aña y ultimamente bo por bisa tres, cuatro aña pasa Tico a forma parti di un conhunto cu Cay Luidens. Lamentablemente door di cierto problemanan cu Tico tin fisicamente, e mester a stop di berdad. Sinembargo, Tico a sigui canta su boleronan tur aña cu e haya invitacion pa duna un presentacion.



## Desaroyo Musical

Tin hopi palabracion mester tuma luga, entre empresarionan con pa bo yega tal caminda. Tico ta kere cu awor e sistema lo ta mescos ainda. Bo mester traha adelanta bo programa di henter aña mes! Bo tin di traha hopi bon cu bo calender, sino bo ta pega barco. Semper nan a mara nan mes na contractnan. E disciplina cu nan tabatin, hopi biaha bo ta haya den conhunto mes, ora bo ta bay toca cierto caminda. E tempo aya, bo ta lag’e na e gentilesa di e persona cu a pidi bo pa bin toca, si nan kier duna bo algo di come y bebe.



**The Hap Cats**

kende tabata un hende cu ta gusta bisti! Ta continuamente nan ta na e costurero King (dfm) na San Nicolas. Nan tabata bisti e bachinan mas extravagante, bunita, cora, berde, tur ora nan tabata bisti masha bunita mes! Y cabando den Latin Power tabata mesun cos! Un anecdotia di tempo di The Golden Notes. Joy Kock a bin cu e idea pa nan a bin bisti tur na blanco anto un dashi cora. Den e lobby un di e mucha

Pa loke ta vestuario, esey si Tico ta bisa bo, nan tin di para keto un rato! Si bo weita e musiconan awendia con nan ta bisti, bo ta bisa: “Oh my God.” Si ta tempo di nan tempo, bo no ta subi podium asina! Pa cuminsa, na Aruba Caribbean Hotel, bo mester tabata picobelo, bunita y bon bisti. Nan a cuminsa cu e nomber di banda cu ta papia pa su mes: ” Los Elegantes”. Nan tabata bisti elegantemente, den Hap Cats tabata mescos. Den Oruba Sextet nan tabatin defunto Echi Odor



hombenan cu ta traha na Sheraton di cu awor si nan ta parce poco termometer! Pasobra nan ta completamente na blanco cu dashi cora. Pa loke ta zonido riba podium, Tico por conta lo siguiente. Antes bo tabatin defunto Nancho Luidens, tata di Farita Luidens, kende tabata huur su ekipo y e microfonna grandi ey. Practicamente bo ta sconde bo cara tras di e microfon. Y e tempo ey bo tin di paga bon tino, pasobra si bo

**Tico ta corda tabatin e amplifiernan bieu pa bo sinta ta drey na dje pa e traha un sorto di echo**

pone bo boca mucho cerca di e microfon bo ta haya un shock di coriente tambe! Kier men, wak pa bo hala leu! Despues a bin e sistema cu cada conhunto ta cana cu nan ekipo. Y awor bo ta haya ekiponan asina sofisticada, cu reverb, echo etc.! Tico ta corda tabatin e amplifiernan bieu pa bo sinta ta drey na dje pa e traha un sorto di echo, cu ta duna bo un stem pisa. Aworaki tur hende, tur cantante ta depende di e microfon bunita ey.

## Desaroyo como cantante

E desaroyo como cantante a cuminsa tempran, den “De Trupialen” mes, aunke Tico no tabata forma parti di e organisacion aki. Tico a drenta den e grupo ora su ruman a sali, pasobra e no por a keda den “De Trupialen”, como cu e tabata casa. E ora Tico a tuma su luga. Ey bo por bisa Tico a cuminsa na aña 1960 activamente. Pero cu su 15 aña caba el a start cu cantamento.

## Grabacion

Cu Latin Power nan tin grabacion. Nan a bay graba te na Bogota. Y nan a graba aki mes na Tele Aruba tambe cu Tirso Steba (dfm). Na Colombia nan a graba cu Henky Braafhart y Tito Flores tambe. Nan a graba e tempo ey disco cuarenticinco. Na Colombia nan a graba den un studio cu ocho canal, loke ta poco compara cu awor. Pero asina e tabata antes. Den Tico su caso, e tabatin den su cabes semper pa graba algo. El a dura algun aña prome cu el a realisa su sueño. Danki na Johnny Scharbaay, Tico tin un cd cu ocho cancion di bolero. Pero den Latin Power si nan tabatin planea cu ta tanto piesa nan ta bay graba y nan a prepara kisas un par di luna cu hopi training.

Despues nan a tuma contacto cu e studio na Bogota. Den e caso di Latin Power no tabata tin cover (caratula of kaft), pasobra ta disco cuarenticinco e tabata. Den e caso di e cd di Tico, ta su sobrino a yud’e masha hopi mes. Pa pone e potret, pa hinca tur cos den otro. E tabata fantastico haci. Y den e caso di su cd ta Johnny Scharbaay mes a haci e areglonan pa Tico cu porcierto el a haya hopi elogio ora cu nan a wak e nombenan di e hendenan cu a compana Tico riba e cd. Nan ta bisa Tico cu el a scoge crème de la crème. Mayoria ta musiconan cu a bay conservatorio. E tabata un dushi experiencia, sigur cu si!

## E parti internacional

Cu “Latin Power” nan a biaha pa Corsou, Venezuela, Colombia y cu “Oruba Sextet” nan a bay Suriname na Torarica. Despues nan a haya te hasta chens cu nan por a bay Singapore, den e cadena di Sheraton, pero lamentablemente el a keda na planeamento so. Nan no por a hacie mas, ya cu nan tur tabata seis hende cu bon trabou. Dus tabata dificil pa bo bay laga esey, anto bay den un aventura cu bo no sa kico e lo por bira. Na Aruba Tico a yega di actua den Festival di tumba y tambe Tico a canta den Festival Voz di Oro. Tico a yega di gana Festival di Posterijen.

Y na aña 2007, e tabata na un concierto mas bien na Cartagena, pa un presentacion di son y bolero. Ta prome biaha di su bida cu el a canta dilanti 3000 hende! Pero esey tabata mas o menos internacional. Aki na Aruba nan a toca hunto cu Gran Combo mas di un biaha. “Latin Power” tabata un di e prome conhuntonan cu a biaha pa Corsou, pasobra aya e porta tabata hopi cera mes.



## Sugerencia pa futuro generacion

Tico a ripara un fout grandi cu ta pasando na Aruba cu e muchanan cu ta bay scol di musica. Apenas nan sa do, re, mi, fa, sol, riba un trompet of saxofon, ya nan kier sa cu nan ta cla! Y esey no ta berdad, pasobra musica tin asina tanto faceta amplio cu ta asina rico! Tur dia bo ta siña cosnan nobo den musica. Kisas te hasta un sonido nobo cu bo mes a inventa na e momento ey, cu ni Mozart por a pensa riba dje. Ami lo bisa e muchanan pa dedica na esey! Tur generacion tabatin nan musica. Tempo nan tabata canta Rock & Roll, nan a yama nan tur pa loco! Aworaki bo ta haya musica moderno cu tin dia bo no ta comprende. Pero pa e generacion nobo, esaki ta musica! Pero Tico ta bisa nan kisas, pensa leu, pensa bek manera hopi cantantenan popular di awor, Tico por menciona por ehempel Luis Miguel. Ora cu el a ripara cu e por canta bolero bieu y gana placa cu ne, el a renoba bolero! Y el a bira un exito. E hubentud di awor ta haya por ehempel bolero, un ritmo chapo. Pero, bolero a bin pa keda! Bolero no ta muri. Cuanto ritmo a nace despues di bolero, pero nan a cay. Bolero tin hopi aña caba ta existi. Te hasta tin buki skirbi di dje, shen aña di bolero y mas. Pues, bolero no ta bay muri nunca!



**Latin Power**



**Oruba Sextet**